



Kuvendi i Komunës Klinë

Komiteti për Politikë dhe Financa

01Nr 06-14903 /23

Klinë,dt: 27.09 /23

PROCESVERBAL

Nga mbledhja e III-të e rregullt e Komitetit për Politikë dhe Financa, mbajtur, më 20.03.2023, me fillim nga ora 09:00 në sallën e Kuvendit të Komunës.

Mbledhjen e hapi Kryesuesi, z. Fadil Gashi, i cili përshëndeti të gjithë anëtarët e Komitetit, OSB-në dhe të pranishmit.

Si pika shtesë të rendit të ditës, me propozim të kryesuesit, hynë këto pesë kërkesa:

1. Draft-rregullorja për menaxhimin e mbeturinave në Komunën e Klinës;
2. Draft-Plani komunal për menaxhimin e mbeturinave 2023-2027;
3. Draft-Strategjia për komunikim dhe marrëdhënie me publikun 2023-2026;
4. Draft-Plani i veprimit për informim dhe komunikim 2023-2026;
5. Propozim-vendimi i kryetarit të komunës z. Zenun Elezaj, për subvencionim të qirasë së banimit për znj. Nazife Gucati.

Më pas, kryesuesi, prezantoi rendin e ditës:

1. Arsyetimi i mungesave;
2. Shqyrtimi dhe miratimi i procesverbalit të mbledhjes së kaluar;
3. Shqyrtimi i propozimit të DKRS-së për ndarje të mjeteve buxhetore për mbajtjen e festivalit folklorik "I këndojmë Lirisë";
4. Shqyrtimi i kërkesave të arritura për Komitetin për Politikë dhe Financa për muajin shkurt-mars 2023;
5. Të ndryshme.

Fadil Gashi, Kryesues: Nëse më lejoni, po hapi mbledhjen e radhës të Komitetit për Politikë dhe Financa, duke e pasur informacion që bashkë me rend të ditës e keni marrë edhe materialin, dhe po i uroj mirëseardhjen z. Asdren Ramadanit, meqë është për herë të parë anëtar i ri i KPF-së dhe Valmirës që është për herë të parë.

Te rendi i ditës, nëse pajtoheni unë i kam pesë kërkesa, rendin e ditës e keni marrë, është propozim për të hyrë në pika shtesë: Draft rregullorja për menaxhimin e mbeturinave në komunën e Klinës edhe Draft- Plani komunal për menaxhimin e mbeturinave 2023-2027. Ne e kemi kaluar në Komitet për shqyrtim që e kemi lëshuar në shqyrtim publik, e kemi kaluar në Kuvend dhe e kemi caktuar datën e takimit me publikun para seancës edhe Komiteti le ta merr, ju e merrni edhe sot, keni ditë në vazhdim me grupe, me qytetarë, me këdo që ju e vlerësoni por edhe ditën kur e mbajmë takimin me qytetarë është mirë me qenë bile ju anëtarë të Komitetit bashkë me ne, kur ta shqyrtojmë me qytetarë, me ata që vijnë, nëse hyjmë në rend të ditës ne e kishim shqyrtuar tani.

Pastaj kërkesë tjetër është Draft-strategjia për komunikim dhe marrëdhënie me publikun, është diçka që po na kërkohet, ne e kemi një strategji edhe një rregullore për transparencë edhe është mirë me ja bashkuar edhe këtë si strategji sepse për shkak të performancës edhe për shkak të hapjes sigurisht të komunikimit të plasimit të punës e të aktivitetit e të kërkesave, po kërkohet që komunat ta miratojnë edhe këtë strategji.

Një kërkesë tjetër shtesë është nga shoqata e peshkatarisë “Ujëvarat e Mirushës” në Klinë, në vendim të Kuvendit ju e dini, ne e kemi shpallë si ditë e peshkatarisë në Klinë, është vendim i Kuvendit që ja kemi dhënë këtë ditë, që ata t’i zhvillojnë garat.

Një kërkesë tjetër shtesë, është fjala për vendimin e fundit që e kemi marrë prej Nazife Qallapekut, nëse ju kujtohet për ndarjen e shumës për qira të banesës, nuk e kemi cekë shumë, e kemi lënë në vullnet të Zyrës së Kryetarit sepse ajo ishte kërkesa prej 250 euro dhe ne thamë ta përshtatim me tregun në Klinë, por tash ka defekte se ne nuk e kemi sanksionuar, por duhet të sanksionohet shuma.

Tash u bënë këto pesë kërkesa që janë të mijat si kryesues, para jush, nëse pajtoheni. Rëndësinë u mundova ta jap për secilën, unë po hap debat rreth rendit të ditës me këto propozime që unë i dhashë, a ka dikush?

Tash prezent jemi të gjithë, ishte edhe Blerta, por për shkak të shëndetit nuk mundi të qëndrojë më shumë. Po, urdhëro Tunë Dedaj?

Tunë Dedaj: Përshëndetje për të gjithë, unë pajtohem me këtë rend të ditës dhe me gjitha propozimet që i dhatë ju, po besoj se edhe kolegët pajtohen.

Asdren Ramadani: Përshëndetje për të gjithë, po ashtu edhe ne pajtohemi me të gjitha këto propozime dhe me rend të ditës.

Fadil Gashi, Kryesues: Mirë, dikush tjetër? Kush është për?

Pasi nuk kishte ndonjë vërejtje apo sugjerim, me 6 vota PËR, u miratua rendi i ditës.

Pika 1. Arsyetimi i mungesave.

Fadil Gashi, Kryesues: Te arsyetimi, jemi gjashtë anëtarë, Blerta nuk mundi të qëndrojë për shkak të shëndetit.

Pika 2. Shqyrtimi dhe miratimi i procesverbalit nga mbledhja e kaluar.

Fadil Gashi, Kryesues: A ka dikush diçka rreth procesverbalit nga seanca e kaluar?

Pasi nuk kishte ndonjë vërejtje apo sugjerim, Kryesuesi hodhi në votim dhe me 6 vota PËR, u miratua procesverbali nga mbledhja e kaluar.

Pika 3. Shqyrtimi i propozimit të DKRS-së për ndarje të mjeteve buxhetore për mbajtjen e festivalit folklorik “I këndojmë Lirisë”.

Fadil Gashi, Kryesues: Kërkesa për ndarje të mjeteve është prej 20.000.00 euro. Ne buxhetin e kemi, arsyen e kemi dhe është festival tanimë tradicional dhe gjithëkombëtar, zhvillohet për çdo qershor, tash ju vyejnë për fillimin e përgatitjeve. Unë po hap debat, nëse ka dikush, Tunë, urdhëro?

Tunë Dedaj: Kryesues, unë pajtohem për ndarjen e këtyre mjeteve dhe është shumë e qëlluar dhe është shumë e mirë për qytetarët e Klinës, sepse festivali folklorik “I këndojmë Lirisë”, është një vlerë për komunën tonë, vetëm është mirë me qenë të kujdesshëm, që të raportojnë për paratë që shpenzohen rreth këtij festivali.

Fadil Gashi, Kryesues: Po, mirë është të na sjellin raportin, dhe nëse ju pajtoheni, kjo kërkesë me qenë pjesë e vendimit kur të punohet vendimi i Kuvendit, që të kemi një raport kthyes sepse do të dilte edhe më mirë edhe më transparent. A ka dikush tjetër, a po pajtoheni, kush është për?

Komiteti për Politikë dhe Financa, me 6 vota PËR, rekomandoi që kërkesa të kalojë për shqyrtim dhe miratim në Kuvend. Gjithashtu, rekomandoi që pas përfundimit të festivalit, DKRS të sjell raport në Kuvend lidhur me shpenzimet e kësaj shume.

Pika 4. Shqyrtimi i kërkesave të arritura për Komitetin për Politikë dhe Financa për muajin shkurt-mars 2023.

Kërkesa 1.

Kërkesë e parashtruar nga banorët e fshatrave Gllarevë, Rixhevë dhe Stapanicë të Komunës së Klinës, të cilët theksojnë: Aktualisht nuk kemi sipërfaqe të tokës se ku t'i vendosim apo t'i varrosim personat që vdesin.

Kërkojmë nga Asambleja Komunale, Komuna e Klinës të na ndajë parcelat kadastrale me nr. P-71010034-00661-0 me sipërfaqe 1757 m², parcela me n. P-71010034-00659-0 me sipërfaqe 13759 m², parcela me nr. P-71010034-00658-0 me sipërfaqe 5742 m² si dhe parcelën me nr. P-71010034-00657-0 me sipërfaqe 8003 m², ku të gjitha këto parcela gjenden në Zonën Kadastrale Gllarevë, Komuna e Klinës.

Të bashkangjitura me këtë kërkesë, keni listën e nënshkrimeve të banorëve të fshatrave Gllarevë, Rixhevë dhe Stapanicë, pëlqimin e institucioneve fetare Islame, fletën poseduese të parcelave të përmendura në këtë kërkesë si dhe ortofoton e parcelave.

Fadil Gashi, Kryesues: Kërkesa është që, për shkak se po kanë vështirësi në hapësirat e varrezave, kjo punë është shqyrtuar që dy-tri herë edhe nëpër këto organet tona, mandej kishte edhe përgjigje që kanë marr ata, por drejtoritë tona nuk i kanë kryer punët e veta. Është një përgjigje që ju ka dhënë banorëve që kërkesa e tyre është dërguar në Drejtorinë e Urbanizmit dhe Drejtorinë e Gjeodezisë për të bërë një elaborat me një incizim në terren, m'i parë pronësitë dhe pastaj m'i shikuar mundësitë se si mund të procedojmë, edhe ne po i dimë kërkesat e ligjit për dhënie në shfrytëzim të hapësirave, po ka vështirësi për dhënie në shfrytëzim, por ndoshta me pasur një vullnet me drejtori, me na bërë një elaborat edhe me na kompletuar lëndën, është mirë me ju dal bile të saktë në cilin do variant, veç le të jemi serioz para komunitetit se realisht këta janë në hall për këto varreza. Unë po hap debat, është një kërkesë e nënshkruar nga njerëz të këtyre mjediseve, Gllareva, Rixheva, Stapanica, janë bukur do familje që e kanë rrethin të ngushtuar edhe secilën herë po shkojnë duke u vështirësuar edhe më shumë. Tash unë nuk e di si Komitet por është mirë edhe ne edhe Kuvendi edhe dy Drejtoritë që i potencova, me qenë në nivel të përgjegjësive dhe me marr shumë seriozisht si çështje. A ka dikush?

Tunë Dedaj: Po, kryesues, po shihet që kanë bërë kërkesë edhe përpara ata po nuk ju kanë dalë në ndihmë. Unë propozoj që në Kuvend ne ta marrim një vendim, të kërkojmë prej Drejtorisë së Urbanizmit që të gjendet mënyra që këtyre njerëzve t'ju ndahet ajo parcelë, se është e domosdoshme. Nuk e kanë për asgjë tjetër ata, por e kanë për nevojë, kështu që, unë e përkrahi dhe besoj e përkrahin të gjithë kolegët që janë këtu.

Komiteti për Politikë dhe Financa, me 6 vota PËR, pas shqyrtimit të kërkesës së lartpërmendur, rekomandoi që kërkesa të dërgohet për shqyrtim të mëtutjeshëm në Drejtorinë për Kadastër, Gjeodezi dhe Pronësi, si dhe në Drejtorinë për Urbanizëm dhe Mbrojtje të Mjedisit, drejtorit në fjalë të sjellin në Kuvend një elaborat sa i përket kërkesës së parashtruar nga banorët e këtyre fshatrave, në mënyrë që Kuvendi ta shqyrtojë më tutje kërkesën.

Kërkesa 2.

Kërkesë nga shoqata e peshkatarisë "Ujëvarat e Mirushës" të cilët theksojnë: Me këtë kërkesë, i drejtohem Kuvendit të Komunës së Klinës, që për turneun e "peshkatarisë" i cili mbahet për nder të shënimit të Ditës së Çlirimit të Klinës, të përkrahet me mjete financiare me vlerë prej 1.500.00 (Njëmijepesëqind euro)

Mjetet te cilat do të përdoren për:

- Organizimin dhe mbajtjen e turneut, duke përfshirë edhe ndarjen e çmimeve për garuesit fitues;
- Manifestimin e kësaj dite;
- Rregullimin dhe pastrimi i hapësirës ku do mbahet turneu;
- Ushqyerja e peshkut në këtë periudhë kur ushqimi është i pakët, dhe kontrollimi i peshkimit të jashtëligjshëm nga ekipi kontrollues nga SH.P “Ujëvarat e Mirushës”.

Fadil Gashi, Kryesues: Unë jam për t’iu ndihmuar, urdhëro, Tunë Dedaj?

Tunë Dedaj: Edhe unë jam për t’iu ndihmuar, por mos me jua dhanë 1500 euro se nuk ju shkojnë aq shumë, me jua dhanë 1000 euro, se nuk ka ndonjë shpenzim të madh aty për atë ditë.

Fadil Gashi, Kryesues: Mirë, a ka dikush tjetër?

Mendehie Duraku: Faleminderit kryesues, përshëndetje për të gjithë! Unë mendoj që nëse kjo kërkesë me këtë shumë të kërkuar është për një vit, atëherë nuk janë shumë 1500 euro të ju ndahen, nuk jam e pajtimit 1000 por të jetë 1500 se gjatë një viti besoj që ju duhen mjete, faleminderit!

Tunë Dedaj: Kjo është vetëm për atë ditë që mbahet turneu.

Fadil Gashi, Kryesues: Veç një, pa dashtë me paragjykuar a 1000 a 1500, e para po kuptoj që ne jua kemi dhanë këtë ditë vet me vendimin tonë edhe ju kemi thënë që do t’i mbështesim, edhe këtyre është mirë tash në vendimin tjetër me jua lëshuar sikur ata të parin, me na sjellë raportin, edhe e paskemi lehtë sepse në vendim në pikën e tretë e kemi thënë se, turneu do të organizohet nën përkujdesjen e komunës së Klinës, përkatësisht Drejtorisë së Bujqësisë, le ta kontrollojnë këta çdo cent, në përkujdesje të tyre qenka.

Tunë Dedaj: Kryesues, si ta vendosësh unë e përkrahi, nuk është problem. Veç mu duk e tepërt se aty nuk ka ndonjë shpenzim të madh, në bazë të shkresave për një ditë është ajo, nuk është për një javë.

Mendehie Duraku: A mundemi ne tash, pak a shumë me marr një vendim ose në Kuvend e marrim që, me cilën shumë të vendosim, çdo vit këta e kanë këtë turne, të jetë gjithë kjo shumë e ndarë prej komunës, se këta nëse sot kanë shkuar me 1500 euro nesër mund të na vijnë me 2000, vitin tjetër mund të na vijnë me më shumë. Tash, thjeshtë ta dimë a e bëjmë si vlerë që duhet të mbetet ashtu 1500 ose 1000 për çdo vit gjatë turneut, se nëse sot ja japim 1500, ndoshta vitin tjetër vijnë me 2000.

Fadil Gashi, Kryesues: Shiko, kjo që po thotë Mendehia ndoshta është e mirë, por ndoshta kishte me qenë mirë edhe sivjet ne me vendos kështu edhe vitin tjetër me na sjellë kërkesën Drejtoria e Bujqësisë. A ka dikush tjetër?

Komiteti për Politikë dhe Financa, pas shqyrtimit të kërkesës së parashtruar nga shoqata e peshkatarisë për mbështetje financiare, me 6 vota PËR, rekomandoi që për organizimin e këtij turneu tradicional të ndahen mjete buxhetore në vlerë prej 1000 euro (njëmijë euro). Gjithashtu, rekomandoi që shoqata e peshkatarisë, pas përfundimit të turneut, të sjellë raport të shpenzimeve të këtyre mjeteve në Kuvend.

Kërkesa 3.

Nga tri Organizatat e dala nga lufta e UÇK-së, Degët-Klinë, të cilët theksojnë:

Duke pasur parasysh gjendjen e rëndë të Organizatave të dala nga lufta e UÇK-së, degët në Klinë, të cilat që nga themelimi i tyre nuk kanë kurrfarë burimi financiar institucional për funksionimin e tyre. Në Organizatat e dala nga lufta e UÇK-së, degët në Klinë kërkojmë nga kryetari i komunës konform kompetencave që ka, të merr vendim për mbështetje të rregullt financiare për funksionimin e këtyre shoqatave.

Në bazë të përlllogaritjeve tona, për funksionimin e tri organizatave, na duhet mbështetje financiare vetore në shumë prej 15 000.00 euro (Pesëmbëdhjetëmijë euro)

Arsyetim

Në këtë shumë të mjeteve të kërkuara janë përfshirë: pagat për stafin e tri organizatave, shpenzimet për administratë, shpenzimet për përvjetorë, shpenzimet për vizita të familjeve të tri kategorive, shpenzimet për aktivitete të ndryshme në kuadër të datave të rëndësishme të UÇK-së në Komunën e Klinës dhe gjithë territorit të Kosovës e më gjerë. Mbesim me shpresë që kjo kërkesë do të merret parasysh si dhe të realizohet pozitivisht. Njëherit ju falënderojmë për mirëkuptim!

Fadil Gashi, Kryesues: Do të thotë, tash i bie ka 5000 për secilën shoqatë, me thënë të drejtën komunat tjera kanë këso vendime dhe i mbështesin, e kam këtu një vendim të komunës së Prishtinës që po i mbështetke kështu. Ne po e pranojmë si të mirëqenë këtë kërkesë edhe kur ta bëjmë buxhetin, neve nuk na bëjnë gjë për 15.000 euro. Po, urdhëro, Tunë Dedaj?

Tunë Dedaj: Kryesues, kjo është e domosdoshme për me ju ndarë, por këtë është dashtë Qeveria, me qenë fondi i ndarë për ta, me qenë në nivel të Kosovës, po edhe nëse marrim një vendim me jua ndarë është mirë me na raportuar se ku i kanë dërguar paratë, se 15.000 euro nuk janë pak, se janë para të taksapaguesve tonë. Unë kam dëshirë të ju ndihmojë, është mirë të ju ndihmojmë por është dashtë të jetë në vijë buxhetore prej Qeverisë me ju dhanë gjithëve në mënyrë të njëjtë në krejt Kosovën, edhe mos m'i lënë në mëshirën e dikujt tjetër gjithmonë me kërkesa, edhe nëse e bien vendim me na ndarë është mirë me na raportuar paratë e vitit të kaluar se edhe vjet jua kanë ndarë paratë këtyre, m'i raportuar ku i kanë dërguar, ku janë shpenzuar ato para.

Fadil Gashi, Kryesues: Unë jam ithtar edhe kam qenë gjithë, që të kemi raport se ku shkojnë mjetet e Kuvendit, këto që i ndajmë ne si Kuvend, edhe me sjellë raport kthyes është kulturë në fund të fundit, edhe nëse nuk është kërkesë ligjore, është kulturë, transparencë; atë që ta jap unë, ti më tregon se ku e ke dërguar, si e ke shpenzuar, në cilat fusha është investuar, me çka është

mirëmbajtur? Shpenzimet duhet të bëhen me fatura, me mbulesa, me arsyetime. Por, ne po bisedojmë, ne e rekomandojmë për në Kuvend, do të debatojmë edhe në Kuvend bukur seriozisht. Kush është për?

Komiteti për Politikë dhe Financa, pas shqyrtimit të kërkesës së parashtruar nga tri Organizatat e dala nga Lufta e UÇK-së për mbështetje financiare, me 6 vota PËR, rekomandoi që kërkesa të kalojë për shqyrtim në Kuvend.

Pika 5. Propozim-vendimi i kryetarit të komunës z. Zenun Elezaj, për subvencionim të qirasë së banimit për znj. Nazife Gucati.

Kërkesë nga Zyra e Kryetarit të Komunës, nga e cila kërkojnë që të hyjë në rend të ditës në mbledhjen e KPF-së të datës: 20.03.2023 kërkesa e palës Nazife (Bajram) Gucati nga Klina, që ka të bëjë me ndarjen e mjeteve financiare për pagesën e qirasë mujore për një periudhë të caktuar një vjeçare me propozim nga 150 € në muaj.

Ku theksohet me rastin e pranimin të kërkesës së palës Nazife Gucati, kërkesa nr.01-553-995/2023 e datës 10.01.2023, ne si ekzekutiv kemi shqyrtuar mundësitë financiare dhe ju njoftojmë se jemi të gatshëm që pas konfirmimit tuaj t'i lejohet ndarja e mjeteve financiare për pagesën e qirasë mujore për periudhën 1 vjeçare në shumë prej 1,800 € (njëmijë e tetëqind euro) deri në gjetjen e një zgjidhje të familjes së përmendur.

Parashtruesja e kërkesës jeton nga ndihma sociale dhe ka probleme familjare sipas dokumentacionit të parashtruar.

Andaj, mbi këtë gjendje duke u bazuar në dokumentacionin mbështetës të kërkesës së palës, kërkojmë nga ana juaj që të rekomandohet për Kuvend marrja e vendimit për ndarjen e mjeteve financiare në shumë prej 1,800 € (njëmijë e tetëqind euro) për familjen e parashtrueses së kërkesës.

Komiteti për Politikë dhe Financa, pas shqyrtimit të kërkesës së parashtruar nga Zyra e Kryetarit të Komunës, që ka qëllim subvencionimin e qirasë së banimit për znj. Nazife Gucati, me 6 vota PËR, rekomandoi që kërkesa të kalojë për shqyrtim dhe miratim në Kuvend, ashtu siç është rekomanduar nga Zyra e Kryetarit të Komunës.

Pika 6. Shqyrtimi i Draft-Rregullores për menaxhimin e mbeturinave në Komunën e Klinës.

Sa i përket kësaj pike të rendit të ditës, kryesuesi i Komitetit, z. Fadil Gashi, theksoi se kjo është një Draft-Rregullore e cila është model unik në të gjitha komunat, por deri në miratimin e këtij drafti mund të ndryshojmë përmbajtjen dhe çdo gjë brenda saj, në mënyrë që të jetë sa më lehtë e aplikueshme për të gjitha kategoritë të cilat i atakon. Po ashtu, Komiteti për Politikë dhe Financa,

pas shqyrtimit të Draft-Rregullores për menaxhimin e mbeturinave në komunën e Klinës, rekomandoi:

1. Ndryshimin e nenit 23 të draft-rregullores, paragrafi 1 pika 1.1 Kategoria e konsumatorëve shtëpiak- amvisëritë do të paguajnë tarifë fikse prej 6.5 € në muaj.

- **REKOMANDIM, Çmimi i kësaj tarife nga 6.5 euro sa parashihet në Draft-Rregullore të ulet në 6 euro në muaj.**

2. Gjithashtu, të ndryshohet pika 1.1.4 Nënkatëria e katërt: subjektet e mesme deri të mëdha komerciale/industriale me kosto të lartë të shërbimit do të paguajnë tarifë fikse prej 35.00 € ne muaj.

- **REKOMANDIM, Çmimi i kësaj tarife nga 35 euro sa parashihet në Draft-Rregullore, të ngrihet në 40.00 euro në muaj.**

-Po ashtu, u rekomandua të rishikohet neni 24 për faturimin e mbeturinave për mënyrën e pagesës dhe kështet mujore.

Tunë Dedaj: Unë kisha me u angazhuar në maksimum, me jua rritë ndërmarrjeve dhe jam prej atyre që vet kam firmë private, se te ndërmarrjet është shuma shumë e vogël në krahasim me mbeturinat që i bëjnë ata, dmth jo me jua rritë për dy euro, por për pesë euro ose dhjetë euro, se është krejt normale, se ata fitojnë dhe kanë mundësi, sepse në krahasim me familjarët këta bëjnë mbeturina pesë herë më shumë. Pra, propozimi im komplet është me jua bërë ndërmarrjeve të vogla dhjetë euro, se i kanë mundësitë të paguajnë dhjetë euro në muaj.

Kur e them kështu, e them se unë jetoj në Shëngjin, edhe atje paguaj për dy vende, për restorant veç e për hotel veç, edhe është shuma pesë herë më e madhe se këtu, e nëse ekonomia familjare është e obliguar të paguajë 6.50, atëherë përse ndërmarrja t'i paguajë veç dy euro më tepër? P.sh., unë e kam një propozim konkret që, shkollat dhe objektet fetare të lirohen, mos t'i paguajnë mbeturinat, se ato nuk marrin para prej shtetit, marrin para prej popullit, ky është propozim i imi, por ndoshta unë në fund të fundit pajtohem me ju, si e merrni vendimin ju.

Fadil Gashi, Kryesues: Kjo pjesa e parë, unë po insistoj në debat me qytetarin kur të mbahet sepse nëse na vjen qoftë një anëtar i biznesit na ndihmon shumë kjo që po e thua për Shqipërinë, sepse e jep një përvojë tënden me një praktikë që përdoret në një shtet tjetër, edhe ndoshta e bën për ta menduar edhe biznesin që vjen këtu në debat, a ka dikush tjetër?

Tunë Dedaj: Pasi është rreth këtij planit për mbeturina, unë e kam edhe një propozim: që komuna ta formojë një organizatë ose firmë për bartjen e mbeturinave të ngurta.

Fadil Gashi, Kryesues: Kjo është shumë e arsyeshme dhe këto që po i themi, ne, në fund do t'i votojmë, ndërmarrja me krejt atë staf, me krejt ato pajisje do të operojë veç në bazë të këtij dokumenti. Nëse ne nuk po i sanksionojmë këto qysh po i themi, kot ne flasim, ata s'mund të dalin jashtë kësaj, nëse ne ja sanksionojmë këto, unë po besoj se ata janë të vetëdijshëm tani në implementim të kësaj rregullore, dikush tjetër?

Komiteti për Politikë dhe Financa, me 6 vota PËR, rekomandoi që Draft-Rregullorja për menaxhimin e mbeturinave në Komunën e Klinës së bashku me të gjitha vërejtjet dhe sugjerimet të cilat vijnë deri në seancë të shqyrtohen nga Kuvendi dhe më pas të miratohet.

Pika 7. Shqyrtimi i Draft-Planit Komunal për Menaxhimin e Mbeturinave 2023-2027.

Fadil Gashi, Kryesues: Këtë e kemi veç me lëshuar në diskutim, a ka dikush? Kush është për?

Komiteti për Politikë dhe Financa, pa ndonjë vërejtje apo sugjerim, me 6 vota PËR, rekomandoi që Draft-Plani komunal për menaxhimin e mbeturinave 2023-2027 të kalojë për shqyrtim dhe miratim në Kuvend.

Pika 8 dhe 9. Shqyrtimi i propozimit për vënie në diskutim publik:

Draft-Strategjinë për komunikim dhe marrëdhënie me publikun 2023-2026.

Draft-Planin e veprimit për informim dhe komunikim 2023-2026.

Fadil Gashi, Kryesues: Bashkë me Draft- strategjinë është edhe Plani vjetor i veprimit, edhe kjo është për t'u lëshuar, dyjat janë të njëjta. Po, urdhëro, Vlora Tafili?

Vlora Tafili, (zyrtare për Informim): Përshëndetje Kryesues, Ahmet, Monikë dhe ju anëtarë të KPF-së! Këto dyja e kanë një rëndësi goxha të veçantë, por, mos harroni t'i kushtoni pak vëmendje se ka kompetenca në përgjithësi edhe Kuvendi aty, plus ka implikime buxhetore, por, sidoqoftë ne do ta mbajmë bazuar në Udhëzimin Administrativ 30 ditë në diskutim publik dhe besoj që do të takohemi prapë. Nëse keni ndonjë pyetje, unë jam këtu, faleminderit!

Fadil Gashi, Kryesues: Faleminderit, kush është për?

Komiteti për Politikë dhe Financa, pas shqyrtimit të Draft-Strategjisë për komunikim dhe marrëdhënie me publikun 2023-2026 dhe Draft-Planit të veprimit për informim dhe komunikim 2023-2026, pa ndonjë vërejtje apo sugjerim, me 6 vota PËR, rekomandoi që këto dy draft- dokumente të kalojnë për shqyrtim dhe miratim në Kuvend për vënie në diskutim publik.

Pika 10. Të ndryshme.

Fadil Gashi, Kryesues: Në të ndryshme, a ka dikush? Atëherë, po ju falënderoj shumë për pjesëmarrje dhe për angazhim. Shihemi në takimin e radhës.

Procesmbajtësja,
Monika Palushi



KRYESUESI,
Fadil Gashi

